

Ho Sebeletsa Joalo ka Jesu



SABATHA THAPAMA

Bakeng sa Boithuto ba Beke Ena Bala:

Matt. 5:13, 14; Bafil. 2:15; Mareka 12:34; Baef. 4:15; Matt. 4:23–25; Matt. 25:31–46.

Teman'a Khopolo:

“Ha a bona matšoele, a a utloela bohloko, hobane ba ne ba khathetse, ba saretsoe joalo ka linku tse se nang molisa” (Mattheu 9:36).

Jesu o n’ a tsotella batho e le kannete. O’ na na le thahasello ngongorehong tsa bona le lithokong tsa bona ho feta tsa Hae. Bophelo ba Hae bo ne bo tsepame holim’ a batho ba bang ka botlalo. Bosebeletsi ba Hae e ne e le ba lerato le lereko. O ne a sebeletsa lithoko tsa nama, tsa kelello, le tsa boikutlo tsa batho ba mo potileng, ‘me ka mokhoa o joalo, lipelo tsa bona li ne li bulehela linnete tsa moea tseo a neng a li ruta. Ha a ntse a folisa balepera, a tutubolla lifofu, a thibolla litsebe, a lokolla ba kenoeng ke batemona, a fepa ba lapileng, a hlokomela bahloki, lipelo li ne li ameha ‘me maphelo a fetoha.

Ke hobane ha batho ba botha khathatseho ea Hae ea ‘nete, ba ne ba bulehela linnete tsa moea tseo a neng a li ruta. Mokhoa oa Krete feela ke ona o tla re fa katleho ea ‘nete ea ho fihlela batho. Mopholosi o ne a tsoakana le batho joalo ka ea thahasellang tse molemo bakeng sa bona. O ne a ba qenehela, a sebeletsa lithoko tsa bona, ‘me a hapa maikutlo a bona. E be o re ho bona, ‘Ntatele.’” — Ellen G. White, *The Ministry of Healing*, leq. 143. Jesu o ile a hlokomela hore lefatše le hloka pontšo ea evangeli joalo feela ka ha le ne le hloka phatlalatsa ea eona. Bopaki bo phelang ba bophelo bo tsoanang le ba Krete bo itelletseng ho sebeletsa ba bang ke bopaki bo matla ba mantsoe ao re a buang ‘me bo fana ka tšepo ho bopaki ba rona.

**Ithute thuto ea beke ena ho lokisetsa Sabatha sa la 22 Phato.*

Katamelo ea Jesu ho Batho

Kamehla Jesu o ne a sheba se molemo bathong. E ‘ngoe ea li qoso tseo baetapele ba borapeli ba neng ba nqosa Jesu ka eona ke hore o “‘amohela baetsalibe, o ja le bona’” (Luka 15:2). Ba ne ba khathatsehile hobane a na le kopano le “baetsalibe.” Chalimo ea bona ea borapeli e ne e le ea ho nena ho e-na le ho kenyelletsa. Ba ne ba maketse ha Jesu a ipolela hore, “‘Ha kea tla ho biletsa ba lokileng pakong, empa e le baetsalibe’” (Matt. 9:13). Borapeli ba Bangoli, Bafarisi, le Basaduse e ne e le ba ho nena. Ba ne ba nahana hore “Etsa sohle seo u ka se khonang ho qoba ho silafatsoa ke sebe.” Thuto ea Jesu e ne e le hosele le ea bona. O ile a ikakhela lefatšeng lena la mokoti oa noha ho le pholosa e seng ho le nena. Ke “‘leseli la lafatše’” (Johanne 8:12).

Bala Mattheu 5:13, 14. Jesu o sebelisitse lipontšo li fe tse peli ho hlalosa balateli ba Hae? U nahana ke hobaneng ha a sebelisitse lipontšo tseo tse peli? Sheba le Johanne 1:9, Johanne 12:46, Fil. 2:15.

Letsoai e ne e le e ‘ngoe ea lisebelisoa tsa bohlokoa ka ho fetisisa lefatšeng la khale. Le ne le bohlokoa haholo, hoo ka nako e ‘ngoe magione a Roma a neng a le sebelisa bakeng sa theko le thekiso. E ne e le letšoao la leruo le lengata. Hape le ne le sebelisoa ho boloka le ho fana ka tatso lijong. Ha Jesu a sebelisa setšoantšo sa letsoai ho tšoantša balateli ba Hae, o ne a hlile a re leruo la ‘nete la lafatše lena ha se batho ba matlahali ba ruileng ka ho fetisisa.

Leruo la ‘nete la lafatše lena ke Bakreste ba itetseng ba etsang phetoho bakeng sa ‘muso oa Molimo. Liketso tsa bona tsa bosebeletsi ba lerato le ho hloka boichebo li boloka molemo oa lafatše ‘me li fana ka tatso sebakeng sa lona. Setšoantšo sa bobeli seo Jesu a se sebelisitseng (ho Mattheu 5:14) e ne e le sa “‘leseli la lafatše.’” Leseli ha le qobe lefifi. Le khanya lefifing. Ha le ikarole ho lefifi. Le phunyelletsa lefifi, fetola lefifi leseli. Balateli ba Jesu ba lokela ho phunyelletsa lefifi la lafatše lena bohaisaneng ba bona, metseng, litoropong tse nyenyane, le tse kholo ho bonesa ka khanya ea Molimo.

Kamor’a ho lemoha mantsoe a Jesu ho Johanne 17:15–18, ke joang re ka utloisisang taba ea ho ikhetholla ho lafatše ho qoba lafatše? A na ke ntho e tsoanang? Jesu o ne a bolela eng ha a re barutuo ba hae ba tla ba lefatšeng empa e se ba lafatše? Ke joang re ka etsang taba e joalo?

Matšoaro a Jesu Bathong

Sepheo ea Jesu e ne e le ho hlalisa molemo o fetisisang kahare ho batho. Leha maemo a ne a qholotsa hangata, o ne a arabela ka mohau. Luka o tlaleha hore matšoele a ne a “makala ke mantsoe a molemo a neng a tsoa molomong oa hae” (Luka 4:22), ‘me evangeli ea Johanne e tlatsa hore “mohau le ‘nete li hlalisoetsoe ka Jesu Krete” (Johanne 1:17). Katamelo ea Hae bathong e ne e ba hlokisa bora. Mantsoe a Hae a molemo a ne a ama lipelo tsa bona ho arabela.

Bala Mattheu 8:5–10 le Mareka 12:34. Ke mantsoe a fe a tletseng tšepo ao Jesu a ileng a a bua ho batho ba neng ba sa lebelלה—moaloli oa ba lekholo oa Roma le mongoli oa mo-Juda?

Polelo ea Jesu ho molaoli oa mabotho a Roma e ne e le e fetolang maoa. Nahana kamoo mookameli enoa oa sesole a ileng a ikutloa kateng ha Jesu a re tumelo ea boemo boo ha a e-so e fumane le Iseraeleng eohle. Nahana le ka mehopollo eo mongoli oa mo-Juda ha Jesu a ne a re, “Ha u hole le ‘muso oa Molimo.” Jesu o ne a e-na le bokhoni ba ho ntša tse molemo ka ho fetisisa kahare ho batho. Ke lintho tse fokolang feela tse ka fihlelang moo mantsoe a molemo a ka fihlelang ho bula lipelo tsa batho bakeng sa evangeli. Batla se molemo bathong ba u potileng ‘me ba tsebise hore oa ba utloisisa.

Bapisa Esaia 42:3; Bakolose 4:5, 6; le Baefese 4:15. Ke litšiea li fe tsa bohlokoahali tseo litemana tsee li re rutang tsona ka ho arolelana tumelo ea rona le ba bang le ka kamano ea rona le bona?

Ha mantsoe a rona a khothatsa hape a tletse mohau, a ba le tšusumetso e molemo maphelong a ba bang. Mantsoe a boporofeta a Esaia a senola hore Jesu ha a “khaole lehlaka le robhileng” kapa ho “tima lebonenyana le sa kubellang.” Ka mantsoe a mang, Jesu o ne a le lereko hoo a neng a le hlokolosi hore a se utloise bohloko motho ea fihlang tumelong ho sa hloka hape kapa a time tlhasenyana ea tumelo e lipelong tsa bona.

Hobaneng tsela eo re buang lintho ka eona e le bohlokoa joalo ka, kapa e le bohlokoa ho feta, seo re se buang? U arabela polelo ee joang: “‘Nete ke ‘nete, ‘me batho ba e nke e le joalo kapa ba e tlohele’?” ke eng e phoso ka polelo ee ea ‘nete?

Bosebeletso ba Jesu ba Pholiso: Karolo ea 1

Mokhoa oa Morena oa rona oa boevangeli o feta taba feela ea ho boloka khopolong ea rona lipolelo le tsela ea ho beha litaba e hlophisitsoeng; ke bophelo bo manoni bo tsamaeang le maemo ka bo bona. Letsatsi le letsatsi re kopana le batho ba nang le lithoko tsa mefuta: tsa nama, tsa kelello, tsa boikutlo, le tsa moea. Kreste o lakatsa ho fihlela lithoko tseo ka rona ka hore re bontše khathatseho ka bolutu ba batho, mahlomola, le lipelo tse bohloko, joalo ka ha re bontša thahasello thabong ea bona, tšepong ea bona, le litorong tsa bona. Jesu o ne a sebeletsa lithoko tseo batho ba neng ba iikutloa hore ba na le tsona e le hore khabareng a tle a fihlele lithoko tsa bona tse tebileng. Tlhoko eo motho a e utloang ke karolo eo ea bophelo eo ho eona motho a utloang hore o sitoa ho fihlela tharollo ea eona ka boena. E ka ba tlhoko ea ho tlohella ho tsuba, ho theola boima ba ‘mele, ho ja hantle, kapa ho fokotsa khatello ea maikutlo. E ka ba bohloki ba lijo, lehae, kapa kalafo. E ka ba tlhoko ea tlhabollo ea lenyalo kapa lelapa. Tlhoko ea mapomelo, leha ho le joalo, ke seo batho ba se hloakang ka ho fetisisa—tlhoko ea kamano ea motho le Molimo le ho hlokomela hore bophelo ba bona bo na le boleng ba bosafeleng. Poelano le Molimo lefatšeng le pshatlehileng ke eona tlhoko ea rona ea mapomelo.

Bala pale ea motho ea omelletse litho ho Mattheu 9:1–7 le ea mosali ea nang le phallo ea mali ho Mareka 5:25–34. Ke sesupo se fe seo lipaleng tsee ka bobeli se re bontšang hore Jesu o ne a amahanya bokulo ba ‘mele le bohloki ba mapomelo ba poelano le Molimo?

Bosebeletsi ba Jesu ba pholiso bo ne bo kenyetsetsa se fetang feela pholo ea ‘mele le maikutlo. Jesu o ne a batla batho ba fihlele botlalo boo sebe se bo sentseng. Ho Kreste, pholo ea ‘mele kathoko ho ea moea e ne e sa fella. Haeba lerato la Molimo le re khotlaetsa ho lakatsa boiketlo ba motho nameng le maikutlong, hape le tla re susumetsa ho laba-labela boiketlo ba motho eo le moeeng e le hore a tle a phele bophelo ka botlalo mona le ka bosafeleng. Haholo hobane, motho e mong le e mong eo Jesu a mo folisitseng o ile a shoa qetellong. Kahona, tlhoko ea bona ea ‘nete, kaholimo ho tsohle, e ne e le ea moea, na ha ho joalo?

Ke maleke a fe ao kereke ea heno e ka a nkang motseng ho fihlela lithoko tsa batho ‘me e bontše hore re feela re ba tsotella e le kannete? Nahana ka batho ba motseng oa hena. Kereke ea heno e etsa eng ho fetola maphelo a batho?

Bosebeletsi ba Jesu ba Pholiso: Karolo ea 2

Bala Mattheu 4:23–25 le Mattheu 9:35. Ke katamelo e fe e mekhahlelo e meraro e neng e bopa motheo oa bosebeletsi ba Jesu? O ne a fihlela lithoko tsa batho joang, ‘me ho ne ho ama maphelo a batho joang?

Jesu o ne a kopanya bosebeletsi bo mekhahlelo e merero ba ho ruta, ho rera, le pholiso. O ne a arolelana litšiea tsa bofefeleng e le hore kaofela ha rona re tle re phele maphelo a nang le moelelo le sepheo. O ile a re, “Ke tlile hore li tle li be le bophelo, li bo bone ka ho fetisisa” (John 10:10). Bosebeletsi ba Hae bo ne bo senola mohau o fetisisang. ‘Me Jesu o ne a tlile hore re phele bophelo “bo fetisisang” hona joale le ka ho sa feleng.

Bala Mareka 1:32–39. Jesu o ne a qeta letsatsi lohle a ntse a folisa ba kulang, a leleka batemona. Kamor’a ho qeta nako thapelong hoseng ha letsatsi le hlahlamang ha batho ba ne ba batla pholiso e fetisang, o ile a tsamaea ho ea motseng o mong. Hobaneng a sa ka a ba folisa? Hlokomela mabaka a Hae temaneng ea 38 le 39.

Pale ena e na le temoso. Kamor’a ho phekola matšoele letsatsi pele, letsatsi le latelang Jesu o siea matšoele, a ntseng a mo batla ‘me a ntseng a hloka pholiso. Tlhaloso ea Hae ke hore lebaka leo a tlileng ka lona lefatšeng lena ke ho tla ruta evangeli. Jesu e ne e se feela motho ea etsang mehlolo e makatsang. E ne e le Mora oa Molimo ea halalelang ea tlileng thomong ea topollo. O ne a sa khotsafatsoe feela ke hore o ntse a folisa maloetse a ‘mele. O ne a nyoretsoe hore batho ba amohele mpho ea bophelo bo sa feleng eo a neng a tlile ho fana ka eona. O ile a qaqisa sepheo sa ho tla ha Hae sa ho tla lefatšeng ka mantsoe ana: “ ‘Hobane Mor’a motho o tlile ho batla le ho pholosa ho timetseng’ ” (Luka 19:10). Ketso ka ‘ngoe ea pholiso e ne e le monyetla oa ho senola semelo sa Molimo, ho felisa mahloko, le ho fana ka monyetla oa bophelo bo sa feleng.

A na ho ea khoneha ho phela bophelo boo Jesu a fanang ka bona ka ho fetisisa haeba u le mofumanahi kapa u kula? Na hona le se seng seo Jesu a neng a se fa batho se tebileng ho feta pholo ea ‘mele? Re ka tataisetsa batho linneteng tsa moea joang ka litsela tse tšoarehang ha re sebeletsa lithoko tsa bona tsa nama le tsa maikutlo?

Sa Bohlokoa ho Jesu

Molaetsa oa Jesu ho barutuo ba Hae ho Mattheu 24 o kopanyang liketsahalo tse amanang le tšenyeho ea Jerusalema le matsatsi a pele ho tla ha Hae o saloa morao ke litšoantšo tse tharo tsa mehla ea bofelo ho Mattheu 25. Litšoantšo tsena li hloaea makhabane a semelo a batloang ke Jesu ho batho ba emetseng ho khutla ha Hae ha bobeli. Setšoantšo sa baroetsana ba leshome se thatiselletsa bohlokoa ba bophelo ba ‘nete, bo tiileng, bo tletseng ka Moea. Setšoantšo sa litalenta tse leshome se thatiselletsa bohlokoa ba ho sebelisa ka botšepeli lineo tseo Molimo a re fileng tsona ka bomong ba rona. Setšoantšo sa linku le lipoli se senola hore Bokreste ba ‘nere bo sebeletsa lithoko tsa bao Molimo o ba tlišang maphelong a rona letsatsi ka leng.

Bala Mattheu 25:31–46. Jesu o hlalosa Bokreste ba ‘nete joang? Thathamisa likarolo tsa bosebeletsi tseo litemana tsena li buang ka tsona.

Leha litšoantšo tsena li bua ka ho fihlela lithoko tsa ‘nete tsa batho tsa ‘mele—karolo ea pale eo re sa lokelang ho e lahla—ke hore ho ka etsahala e be ho na le se fetisang moo? Ho na le tlala e patehileng le ho nyoreloa Jesu meeng ea batho tse hlokang ho khotsofatoa (Johanne 6:35, Johanne 4:13, 14). Bohle re baeti ba nyoretsoeng lehae ho fihlela re fumana seo re leng sona ho Krete (Baef. 2:12, 13, 19). Re hlobotse moeeng ho fihlela re apesoa ho loka ha Hae (Tšen. 3:18; Tšen. 19:7, 8). Baporofeta ba Testamente ea Khale ba ne ba hlalosa boemo ba botho e le ba motho ea kulelang lefu (Esa. 1:5, Jer. 30:12–15). Bokulo ba sebe ke bo isang lefung, empa moporofeta o re supisa pheko. “ ‘Hobane ke tla u tlamella, ke folise maqeba a hao,’ ho bolela Jehova ” (Jer. 30:17). Jesu ke pheko ea bolotse bo bolaeang ba meea ea rona.

Setšoantšo sa linku le lipoli se re ruta hore re fihlele lithoko tsa nama tsa batho ba re potileng, empa se etsa ho fetisang hoo. Ke pale ea Krete ea fihlelang bohloki bo tebileng ka ho fetisisa ba moea, ‘me ke memo ea Hae ea ho sebetsa le Eena ho sebeletsa batho ba re potileng. Ho phela maphelo a boichebo e be re lesa lithoko tsa nama, tsa kelello, tsa maikutlo, le tsa moea tsa ba bang ke ho ipeha kotsing ea ho lahleha ka ho sa feleng. Setšoantšong, ba nehelanang ka bophelo ba bona bakeng sa ho hong kathoko ho bona feela, ba thoholetsoa ke Morena oa bona ‘me ba amoheloa ho bosafeleng, ha ba phelelang ho khotsofatsa lithoko tsa bona feela ‘me ba lesa lithoko tsa ba abng ba tsuo ke Morena oa bona.

Ho Ithuta Haholoanyane:

“Ba bangata ha ba na tumelo ho Molimo ‘me ba lahlehetsoe ke tšepo ho motho. Empa ba thabela liketso tsa qenehelo le lithuso. Ha ba bona ea sa reng letho ka thoriso ea lefatše kapa kuno e tlang lehaeng la bona, a sebeletsa ba kulang, a fepa ba lapileng, a apesa ba hlobotseng, a khothatsa ba pelo li bohloko, ‘me ka bonolo a ba supisa ho Eena eo mosebeletsi enoa oa motho e mpang e le moromuoa feela oa lerato le qenehelo ea Hae—ha ba bona seo, lipelo tsa bona lia ameha. Ba tlaa teboho. Tumelo ea hotetseha. Ba bona hobane Molimo oa ba tsotella, ‘me ba itokisetsa ho mamela ha Lentsoe la Hae le buloa.”—Ellen G. White, *The Ministry of Healing*, leq. 145. Bosebeletsi bo hlokang boichebo ba Jesu bo bula lipelo, bo khalemela lenyatso, e be bo bopa kamohelo ea evangeli. Kereke ke ‘mele oa Kreste o fihlelang litlhoko hohle ka lerato. Kreste o re romella metseng ea rona ho ea etsa phetoho ka lebitso la Hae. Leha ka ho otloloha, re lokela ho ba hlokolosi hore re se silafatsoe ke lefatše (‘me eo ke kotsi e phelang e tobileng kereke), re ntse re lokela ho ithuta ho fihlela batho moo ba leng teng le ho sebelisoa ke Molimo, o batlang ho ba tlosa moo ba leng teng ho ba isa moo ba lokelang ho ba teng.

Lipotso tsa Puisano:

1. Hobaneng ha besebeletsi ba Kreste ba lereko bo le matla ha kaalo ho khalemela lenyatso le ho bulela batho ho utloa linnete tsa moea? Leka ho nahana kamoo bopaki ba rona re le batho ba ka bang matla a fetisang kateng haeba re ne re ka bonahala na le khathatseho e hlokang boichebo e tšoanang ho ba bang joalo ka ha Jesu a entse.
2. Nahana ka nako e ‘ngoe eo u neng u bue ntho e ‘ngoe eo e neng e le ka ba ke ‘nete, e nepahetse, e bile e hlokeha—empa oa e bua hampe, ke hore, ka lentsoe le lebe kapa katamelo e mpe. U ile oa ithuta eng boiphihlelong boo e ka u thusang hore u se ke oa e pheta hape, joalo ka ho ema ho fihlela u tsitsitse maikutlong pele u bua, kapa ho tšoanang?
3. Tsitsa tabeng ea hore le batho ba folisitsoeng kaofela le ba tsositsoeng bafung ba ne ba tla qetella ba shoele. See se lokela ho re bolella eng ka tsela eo re lokelang ho tsoara maleke le besebeletsi ba rona ho ba re potileng?
4. Kereke ea hau e ka kena mefuteng e fe ea besebeletsi motseng oa haeno eo e ntseng e sa e etse ha joale?
5. Re ka etsa menyetla ea moea joang bakeng sa ba patlong ka besebeletsi ba rona ba litlhoko tse hlokomelhileng?